

## Туберкулездің жұқпалы түрімен ауыратын азаматтарды мәжбүрлеп емдеу туралы

### *Күші жойған*

Қазақстан Республикасының 1999 жылғы 10 желтоқсандағы N 496 Заңы. Күші жойылды - Қазақстан Республикасының 2009 жылғы 18 қыркүйектегі N 193-IV Заңымен

*Ескерту. Заңның күші жойылды - ҚР 2009.09.18. N 193-IV (қолданысқа енгізілу тәртібін 186-баптан қараңыз) Заңымен.*

### МАЗМҰНЫ

Осы Заң мемлекет пен туберкулездің жұқпалы түрімен ауыратын және емделуден жалтаратын азаматтардың арасындағы құқықтық қатынастарды реттейді және азаматтардың денсаулығын айналадағы адамдарға қауіп төндіретін аурудан қорғауға бағытталған.

#### **1-бап. Негізгі ұғымдар**

Осы Заңда мынадай негізгі ұғымдар пайдаланылады:

1) туберкулездің жұқпалы түрі - ауру адамның сыртқы ортаға туберкулез бактерияларын бөліп шығаруына байланысты айналадағы адамдарға қауіп төндіретін ауру;

2) медициналық тексеру - аурудың диагнозын қою үшін зерттеудің зертханалық және аспаптық әдістерін қолдана отырып, адамды медициналық ұйым жағдайында тексеру;

3) мәжбүрлеп емдеу - туберкулездің жұқпалы түрімен ауыратын адамды сот шешімінің негізінде стационарда емдеу;

4) емдеуде болу режимі - туберкулездің жұқпалы түрімен ауыратын адамның басқа адамдарға ауру жұқтыруына жол бермеу мақсатында туберкулезге қарсы мамандандырылған емдеу-алдын алу ұйымында белгіленетін режим;

5) туберкулезге қарсы мамандандырылған емдеу-алдын алу ұйымы - туберкулездің жұқпалы түрімен ауыратын адамдарды мәжбүрлеп емдеуге де, ерікті түрде емдеуге де арналған ұйым (орталықтар, ауруханалар, бөлімшелер және палаталар);

б) медициналық тексеруден немесе емделуден жалтару - туберкулездің жұқпалы түрімен ауыратын адамның дәрігер ұйғарған немесе тағайындаған емдерді қасақана орындамауы.

### **2-бап. Азаматты туберкулездің жұқпалы түрімен ауырады деп танудың тәртібі**

1. Азаматты туберкулездің жұқпалы түрімен ауырады деп тануды, оны медициналық тексеру нәтижелерінің негізінде денсаулық сақтау ұйымы жүзеге асырады.

Медициналық тексеру жүргізу тәртібін Қазақстан Республикасының азаматтар денсаулығын сақтау саласында басшылықты жүзеге асыратын уәкілетті мемлекеттік органы белгілейді.

2. Туберкулезбен ауыруы себепті есепте тұратын азамат медициналық тексеруден жалтарған жағдайда оны тиісті денсаулық сақтау ұйымының ұсынысы бойынша мәжбүрлеп тексеруден өткізу үшін денсаулық сақтау қызметкерінің қатысуымен ішкі істер органдары арнаулы медициналық автокөлікпен жеткізеді.

3. Туберкулездің жұқпалы түрімен ауырады деп танылған азамат денсаулық сақтау ұйымының шешіміне оның жоғары тұрған органына немесе сотқа шағымдана алады.

### **3-бап. Туберкулездің жұқпалы түрімен ауыратын азаматтарды мәжбүрлеп емдеуге жіберудің негізі мен тәртібі**

1. Туберкулездің жұқпалы түрімен ауыратын азаматтарды мәжбүрлеп емдеуге олардың дәрігер тағайындаған емдеуден бас тартуы негіз болып табылады.

Туберкулездің жұқпалы түрімен ауыратын және емделуден жалтаратын азаматтарды мәжбүрлеп емдеу туралы шешімді денсаулық сақтау органдарының не қылмыстық-атқару жүйесі мекемесінің әкімшілігі жанындағы дәрігерлік комиссияның ұсынысы бойынша сот қабылдайды.

Қылмыстық-атқару жүйесінің түзеу мекемелерінен босатылған, туберкулездің жұқпалы түрімен ауыратын, жазасын өтеу кезеңінде емдеудің толық курсынан өтпеген азаматтарға соттың шешімімен мәжбүрлеп емдеу тағайындалады, бұл үшін түзеу мекемесінің әкімшілігі босатылғанға дейін бір ай бұрын материалдарды сотқа жібереді.

2. Мәжбүрлеп емдеуге жіберу туралы материалдарды, олар келіп түскен күннен бастап бес күн мерзімде, сот мәжбүрлеп емдеуге жіберілетін азаматтың және мәжбүрлеп емдеуге жіберу туралы ұсыныс енгізген ұйым өкілінің

3. Туберкулездің жұқпалы түрімен ауыратын азаматты мәжбүрлеп емдеуге жіберу туралы сот шешімін орындау аумақтың әділет органдарының сот орындаушыларына жүктеледі.

*Ескерту. 3-бапқа өзгерту енгізілді - Қазақстан Республикасының 2006.07.07. N 171 (қолданысқа енгізілу тәртібін 2-баптан қараңыз), 2007.03.26. 240 Заңдарымен.*

#### **4-бап. Мәжбүрлеп емделуде жүрген аурулардың құқықтары**

1. Мәжбүрлеп емделуде жүрген аурулар Қазақстан Республикасы азаматтарының барлық құқықтарын туберкулезге қарсы мамандандырылған емдеу-алдын алу ұйымында болу режимін сақтау қажеттігіне байланысты шектеулермен пайдаланады.

2. Туберкулезге қарсы мамандандырылған емдеу-алдын алу ұйымында мәжбүрлеп емдеуге жіберу соттылыққа әкеп соқпайды.

3. Мәжбүрлеп емдеуге жіберілген аурудың жұмыс орны сақталады.

4. Мәжбүрлеп емдеуде болу уақытында жалпы еңбек стажы үзілмейді және оған есептеледі.

5. Мемлекеттік тұрғын үй қорының тұрғын үйінде тұратын, мәжбүрлеп емдеуге жіберілген аурулардың емдеуде болуының бүкіл уақыты ішінде тұрғын үйі сақталады.

#### **5-бап. Туберкулезге қарсы мамандандырылған емдеу-алдын алу ұйымдарында ауруларды емдеу және күтіп бағу**

1. Мәжбүрлеп емдеуге арналған туберкулезге қарсы мамандандырылған емдеу-алдын алу ұйымдарында ауруларды емдеу және күтіп бағу мемлекеттік бюджет қаражаты есебінен жүзеге асырылады.

2. Туберкулезге қарсы мамандандырылған емдеу-алдын алу ұйымында мәжбүрлеп емдеуді ұйымдастыру мен жүзеге асырудың тәртібі, сондай-ақ онда аурулардың болу режимі Қазақстан Республикасының азаматтар денсаулығын сақтау саласындағы басшылықты жүзеге асыратын уәкілетті мемлекеттік органы бекіткен ережелермен белгіленеді.

3. Туберкулездің жұқпалы түрімен ауыратын адамдарды мәжбүрлеп емдеу олардан туберкулездің микробактериялары бөлініп шығуы тоқтатылғанға дейін жалғастырылады, содан соң олар туберкулезге қарсы мамандандырылған емдеу-алдын алу ұйымынан шығарылуға тиіс және емдеуді жалғастыру үшін тұрғылықты жеріне жіберіледі.

4. Аурудың медициналық тексеруде болған уақыты мәжбүрлеп емдеу кезеңіне есептеледі.

**6-бап. Ауруларды мәжбүрлеп емдеу аяқталғаннан кейінгі медициналық қадағалау және емдеу**

Мәжбүрлеп емдетілген аурулар туберкулезге қарсы мамандандырылған емдеу-алдын алу ұйымынан шығарылғаннан кейін тұрғылықты жері бойынша туберкулезге қарсы ұйымда есепке тұруға және Қазақстан Республикасының азаматтар денсаулығын сақтау саласында басшылықты жүзеге асыратын уәкілетті мемлекеттік органы белгілеген тәртіппен туберкулездің жұқпалы түрімен аурудың қайталануын болдырмайтын ем алып тұруға міндетті.

**7-бап. Аурулардың мәжбүрлеп емдеу аяқталғаннан кейінгі еңбекке және тұрмыстық жағынан орналасуы**

Мәжбүрлеп емдеу аяқталғаннан кейін туберкулезге қарсы мамандандырылған емдеу-алдын алу ұйымынан шығарылған ауруларға жергілікті атқарушы органдар олардың еңбекке және тұрмыстық жағынан орналасуына көмек көрсетеді.

**8-бап. Туберкулездің жұқпалы түрімен ауыратын азаматтардың емделуден бас тартқаны және инфекция таратқаны үшін жауаптылығы**

Туберкулездің жұқпалы түрімен ауыратын және емделуден жалтарып жүрген азаматтар Қазақстан Республикасының заңдарына сәйкес жауаптылықта болады.

*Ескерту. 8-бапқа өзгерту енгізілді - Қазақстан Республикасының 2006.07.07. N 171 (қолданысқа енгізілу тәртібін 2-баптан қараңыз) Заңымен.*

*Қазақстан Республикасының*

*Президенті*